


USA KA HINGPIT NGA KALUWASAN

 Medyo dili ko sigurado kung unsa akong igapamulong karong buntaga. Naglingkod lang ko dinha sa luyo kauban si Igsoong Egan, ug nadungog ko . . . Si Igsoong Neville nga naay ginasulti, ug nagatan-aw siya kanako. Ug miingon ko kang Igsoong Egan, “Ginatawag ba ko niya?”

Ug mitubag siya, “Gitawag ka niya.”

² Ug dayon ania na ako dinhi karon aron magapamulong karong buntaga. Nahinumdom ko, kaniadtong ako . . . Ang bentilador dinha, kon diin ilang . . . ginasyup kadtong tingog, mora ba’g ginasyup gyud kini palayo, pagnaga-estorya ka. Mora gyud nga ginasyup niadtong bentilador kadtong tingog nga dihadaha.

Nadungog ko kaganiha . . . ang pagpamatuod niadtong atua ako didto aron iampo kadtong babaye sa telepono. Ug kadtong nakadawat sa mensahe, nakalimot nga isulat kung asa ang lokasyon sa lungsod nga tawagan ko unta, gikan sa asawa ni Dr. Morrison. Ug sultihan ko kamo kung unsa akong gibuhat, tungod sa inyo tanang pag-ampo, ug sa akoa. Gipandongan nako sa akong mga kamot ang telepono, ug gitudlo ang numero, kung asa man kadto, ug gihangyo ang Balaang Espiritu nga adtoan ang maong babaye. Busa nagatoo ako nga dunggon Niya kana sa samang paagi nga Iyang dunggon kung atong . . . Kita n’yo? Ug gibutang ko na lang kadto. Ug tingali sa ingon niana nga paagi ang gusto sa Ginoo niini. Kita n’yo? Tingali mas maayo kini nga paagi.

³ Ug unya nadungog nako ang mga pagpamatuod samtang atua ako didto, sa usa ka tawo nga si Igsoong babayeng Rook kono adunay . . . Nagtoo ko nga si Igsoong Neville kadtong nagsulti nga kining igsoong babaye nagkaaduna kono og—og pagkahugno sa iyang pangisip, mora’g ingon-ana. Manghawid gyud kita sa Dios alang niana, hinumdomon lang kining usa ka butang: Ang Dios nakaila sa Iyang mga Iyaha. Siya nahibalo sa tanan mahitungod kanila.

⁴ Makadungog ba mo’g tarung diha sa luyo? Kung dili, aduna pa’y mga bakanteng lingkoranan dinhi sa atubangan. Puede mong mobalhin kung gusto ninyo. Ug, tan-awon nato, mao ba *kini* ang pinaka-mikropono? [Nagaingon ang usa ka igsoong lalake, “Dili, sir.”—Ed.] Kini bang ania *dinhi* mao ang pinaka-mikropono? Okey. Tan-awon nato kung puede ba kana ipaduol gamay. Unsa kaha kung dinhi mismo, Gene? Mas okey na kana.

Ug usahay mapagaw ko gamay; dugay-dugay na man gud ko nagwali. Mas okey na ba kana? Mas makadungog na ba kamo?

⁵ Ug siguradong hinumduman nato kining mga butanga sa atong pag-ampo. Ug gusto namong ipahibalo ang mahitungod sa usa ka mahimayaong panagtigum didto sa . . .

Si Igsoong babayeng Rook ba kining akong ginatan-aw? Nagtoo ko nga nagatan-aw ako sa usa ka babaye diha sa luyo nga pareho'g hitsura niya. Sa hunahuna ko, “Sigurado dili ko kaestorya ang iyang kaamgid.” Nagatan-aw ako sa mismong kahitsura niya, dinha sa luyo. Atua siya karon sa Saint Edward's Hospital.

⁶ Ug nahitabo, didto sa Cleveland, Tennessee, ug didto pud sa California, nagkaaduna kami og mahimayaong mga panagtigum. Ang Ginoo nagpanalangin sa hilabihan, ug daghang mga butang ang Iyang gibuhat. Ug nalipay gyud kami tungod niana. Nalipay pud kami nga makabalik sa atong kaugalingong pundok, nga ginaasoy ang kaayo ug kalooy sa Diyos. Ingon niana ang ilang ginabuhat kaniadto sa Biblia.

⁷ Ginapasalamatan gyud nako ang pag-ampo ni Igsoong Neville, o ni Igsoong Beeler, kung giunsa pag-ampo niya alang sa mga tawo, ug—ug ang pagpangayo niya og tabang ug kalooy. Ug kung ato lang gyud tan-awon, kanunay n'yong bantayan, ang tanang nagakahitabo, inyong makita nga aduna gyu'y usa ka butang nga tinuod bahin niini. Ug dayon sa dihang mianhi si Igsoong Neville uban niining mga diakono, ug uban pa, dinhi sa entablado, aron—aron ipahayag ang mga panalangin sa Dios nianang—nianang offering sa iglesia, nadungog nako siya nga ginasulti diha sa iyang pag-ampo ngadto sa Dios, mahitungod niadtong mga kalalaken-an, ug kung giunsa nila pag-ampo ang usa'g usa. Ug makapalipay gyud kana kanako nga madungog ang usa ka pastor nga nagaampo alang sa iyang mga diakono, ug ang mga diakono nagaampo usab alang sa pastor. Pagmakita ninyo ang usa ka iglesia nga nagapanagtambayayong nga ingon niana, bueno, aduna gyu'y butang nga mahitabo. Angay ra nga sa ingon niana nga kahan-ayan ang iglesia. Ug nagahatag kini kanako og ideya alang sa usa ka teksto. Maghisgot unta ko mahitungod sa panalangin didto sa Kadesh, ug ang pagdumili nila nga patalinghugan ang balita sa mga espiya, apan nausab akong hunahuna, ngadto sa laing hilisgotan.

⁸ Ug karon, mahitungod sa pagpang-ayo, aduna lang ko'y gamay nga pagpamatuod nga gusto nakong ipahayag. Naglaum ko kaganiha nga makita ko ang akong anak, nga si Billy, dinha sa luyo, apan anaa na diay kini sa iyang bulsa.

Ug miarang-arang na si Billy diha sa mga panagtigum, kay sa kung unsa siya kaniadto. Nerbiyoso siya kaniadto, ug nagakapungot, ginaingnan niya ang mga tawo, “Oh, panglingkod lang mo! Panglingkod kamo!” Moingon, “Hatagan

man gyud ta ka'g prayer card.” Apan akong namatikdan, bag-o lang, nga nagakalooy na siya sa mga tawo nga anaa sa panagtigum. Kung wala na siya'y nahabilin nga prayer card, iya silang ipasulod didto sa usa ka lawak aron ako silang maampoan.

⁹ Ug nahitabo kana didto sa Chicago, bag-ohay ra. Ug gusto nakong basahon kana nga sulat pag-ania na siya. Wala gyud nako siya makita. Wala man gud siya kahibalo nga moanhi ko karong buntaga, dinhi, ug—ug gusto—gusto nakong basahon ang sulat. Nadumduman ko lang kini sa dihang nahunahuna ko ang daghang mga may sakit. Ug ania kini. Kini usa ka sertipikado nga sulat nga . . .

Nabasa ko man gud sa mantalaan, (wala gyud; ko gisultihan) diin gisaway si Oral Roberts diha sa mga mantalaan, tungod kay ginaampo niya ang usa ka babaye nga adunay diabetes ug namatay kini. Ug ako, karon, isip usa ka Amerikano, ako—gusto ko man pud maminaw sa mga balaod ug—ug sa tawo nga anaa sa awtoridad. Apan sa tan-aw ko dili kana matarung. Unsa kaha kung ila pud kining isulat, sa mantalaan, kadtong tanan nga naampoan ni Oral Robert ug nangaayo, nga mga gibalibaran na sa mga doctor. Unsa kaha, kung makigbaylo sila og puwesto sa makausa, kita n'yo. Dili gyud nila buhaton ang ingon-ana. Ug dayon nahunahunaan ko nga tingali gigubot lang sila og ayo sa yawa, nga, ug gipahanugotan kini sa Dios, nga sa Adlaw sa Paghukom papanubagon sila tungod niana. Apan nahibalo ko nga sa liboan ka mga tawo nga naiampo ni Oral Roberts, nga himalatyon na, ug nangaayo sila.

¹⁰ Busa, nakita ninyo, sila, dili sila patas mahitungod niini. Ipresentar lamang nila ang kaugalingon nilang panan-aw, kanang masinawayong panan-aw, apan ayaw ipresentar ang panan-aw sa pikas. Karon, angay unta nga padayong ginapahibalo sa mantalaan ang publiko bahin sa mga panghitabo. Dayon sa hunahuna ko, kung ang mga tawo adunay kahingawa sa usa'g usa, pag adunay tawo nga maayo, tinuod nga naayo gayud, kinahanglan imantala sa matag mantalaan sa Estados Unidos ang artikulo mahitungod niini. Apan dili nimo sila puedeng suholan nga buhaton kini. Dili. Pag-imantala mo ang usa ka butang nga sama niana, bugalbugalan ug katawan lang nila kini, ug ipadaplin lang nila kana. Apan pagmay butang nga puede nilang sawayon . . . Nagapakita lang kana nga kini nga nasud hapit na sa paghukom. Husto. Ug sigurado gyud ang paghukom, ug wala gyu'y paagi nga makalingkawas niini. Ug ginapadaghan lang nila ang kalayo sa ilang mga ulo, ug uban pa. Ug wala—wala . . . gyu'y pagkahiusa, sa mga prinsipyo! Ang mantalaan, ang mga prinsipyo niini, mao ang—ang pagpahibalo sa publiko mahitungod sa bisan unsa maayo man o dautan, nga nagakahitabo. Apan napahilayo na sila sa ilang mga prinsipyo. Ug pagnapahilayo na sila sa ilang mga prinsipyo, nan sila—dili na nila matuman ang ilang katuyoan.

¹¹ Ug ingon niana usab kini sa iglesia. Pagnapahilayo na ang iglesia sa mga prinsipyo niini, dili na niini maalagaran og maayo ang mga balaan. Kinahanglan kitang magpadayon nga magkauban, kinahanglan nagkahiusa. Kinahanglan nga usa ra ang atong kasingkasing ug nagkauyonay. Kay kon dili, dili gyud nato maalagaran ang Dios o ang mga tawo, gawas nga usa ra ang atong kasingkasing ug nagkahiusa, sa pagbarug sa mga prinsipyo sa Biblia ug sa mga butang nga gisulti sa Dios nga husto. Kinahanglan kanunay kitang mobarug sa nianang mga prinsipyo.

¹² Atua kaniadto si Billy sulod sa kwarto, didto sa Chicago, siya. . . Adunay miduol kaniya, usa ka babaye uban sa iyang bana, adunay kanser sa baga, og himalatyon na. Ug ang iyang asawa usa ka biktima sa polio nga naka-wheel chair na lang, ug bisan pa niana naningkamot siya sa pag-atiman sa iyang bana nga dili na halos makatindog, aduna kini og kanser sa baga. Ug ang ingon ni Billy sa iya, miingon siya, “Ako—pasayloa ko, sir.” Miingon, “Malipay unta ko nga mohatag kanimo og prayer card.” Ug ingon pa niya, “Pero ako—wala na gyu’y nahabilin kanako.”

¹³ Ug mitubag kadtong lalaki, “Bueno, okey ra, dong.” Ang ingon niya, “Okey ra kana.” Miingon, “Naninguha gyud mi nga makaanhi, pero dili gyud masayon alang kanamo.”

¹⁴ Miingon si Billy, “Sultihan ko kamo kung unsay angay ninyong buhaton.” Miingon, “Kuhaon ko lang ang papa nako. Ug dad-on ko siya dinhi, ug ubanan sab nako siya inig gawas niya.” Ug miingon, “Inig kuha nako sa iyaha, pagnadungog na ninyo ang iyang Mensahe,” miingon, “kuhaon dayon dalhon nimo ang imong. . . o ang imong asawa ug ikaw, ug sulod mo nianang gamay’ng lawak didto kon diin nagaagi ako sa pagsulod og paggawas, ug isulti ko sa iya nga iampo mo niya.”

¹⁵ “Oh,” miingon siya, “pagkamatitud-anon nimo, dong. Okey gyud kana.” Kita n’yo? Ingon niana ang—ingon niana ang angay nga kinaiya. Kita n’yo? “Okey gyud kana. Maayo gyud kana.” Kita n’yo?

¹⁶ Ug niadtong gabhiona, si Billy, pagbalik niya didto, bisan supak pa sa giingon na niya, nga gidala pud sa maong tawo ang iyang bayaw-nga-lalaki didto nga adunay mga pagdugo sa baga. Ug ang iyang bayaw-nga-babaye didto, nga may mga pagdugo sa tiyan, tungod sa ulcer, nakasulod usab sila nga kauban nila, medyo gitabangan gyud nga makasulod sila. Mao nga kung inyong tan-awon, mapuno gyud kadtong tibuok lawak, nakita n’yo. Pero niadtong nahuman na ug naiampo na sila, adunay nadawat kaming sulat nga tubag, sa koreyo, nga kadtong lalaki hingpit gayud nga naayo niadtong kanser sa iyang mga baga. Ang babaye pud, ang asawa nga naka-wheel chair, nakatindog na mismo, normal na nga naglakaw-lakaw sama kung unsa siya kaniadto. Ang lalaki usab nga adunay dimapugngan nga

pagdugo sa—sa mga baga, tungod sa tubercular, bug-os na gyud nga naayo. Ug naayo pud ang iyang asawa sa ulcer. Upat silang nangaayo, mismo! Ambot lang kung andam kaha imantala kana sa mga mantalaan. Kita n'yo? Kita n'yo? Kita n'yo? Oh! Pero Dios sa gihapon ang Dios. Ginabuhat Niya ang mga butang sa Kaugalingon Niyang pamaagi, kabalo mo, ug maayo kaayo Siya. Malipayon gayud kita nga masayran nga Siya'y Dios.

¹⁷ Naghisgot kita niadtong miaging buntag bahin sa usa ka magwawali nga atong nailhan, nga kaniadto nagsangyaw-sangyaw, nagapang-ampo alang sa mga masakiton ug tanan na. Ug miadto siya ug nag-ampo niadtong usa ka tawo didto sa ospital sa Louisville, ug usa ka kahimtang sa tubercular, namatay kadtong maong babaye. Miingon kadtong tawo, “Bueno, wala na kinahanglana. . . Ang Dios dili. . . Walay Dios. Kay Iya untang gituman ang Iyang Pulong.” Miingon, “Gidihogan man unta nako siya sama—sama sa giingon sa Biblia. Kung dili Niya tumanon ang Iyang Pulong, nan dili diay Siya Dios.” Ingon pa, “Usa ra diay kini ka libro.”

¹⁸ Karon, mora'g ingon niana gyud kana kung wala ka nakaila sa Dios. Kabahin kana sa Kasulatan, apan dili kini ang kinatibuk-an sa Kasulatan. Nakabase kini sa pagtoo sa usa ka indibiduwal. Kita n'yo?

¹⁹ Ug gisultihan nako ang akong asawa, ingon ko, “Daghan na kaayo'g mga butang ang nangahitabo, maong nasayod ko nga aduna gyu'y ingon niana. Wala ko mahibalo kung unsa ang mahitabo kanako sa katapusan. Mahimong maingon niana pud ko. Kung ipahilayo man kanako sa Dios ang Iyang kamot sa kalooy, mamaingon niana gyud ako. Apan sa dihang ginapapadayon pa Niya ang Iyang kamot sa kalooy ug paggiya kanako, nan magapadayon ako.” Apan gipangutana nako si Meda, ingon ko, “Kinsa diay kadtong atua sa kwarto niadtong buntaga pagkahuman sa panan-awon nga nakita nako ang gamay kong batang babaye, nga si Sharon?”

²⁰ Lain pa'y ato, niadtong miaging adlaw, mora gyud ko'g makuyapan. Naglingkod ko niadto sa dalan. Ug nasayod na kamo sa akong estorya, mahitungod sa panan-awon nako kaniya. Ug nakita nako, dihay miabot nga usa ka batan-ong babaye, nga nagalakaw sa dalan dinhi sa Jeffersonville, eksaktong pareho gyud niadtong panan-awon. Wala ko kapugong sa pagkupot sa akong mga kamot. Sama gyud kaayo kadto sa akong panan-awon mahitungod sa akong gamay nga Sharon! Usa na siya ka batan-ong babaye niadtong panahona.

²¹ Ug human niadtong panan-awon niadtong buntaga, sa dihang didto ko sa Himaya, ako. . .nakig-estorya si Hope kanako, samtang iya akong giakbayan, miingon, “Ayaw kabalaka sa amoa, Bill. Mas maayo ang among kahimtang.”

Misulay ko'g hikog niadtong higayona. Ug ingon niya, "Ayaw na pagkaguol. Isaad kanako nga dili ka na magkaguol pa."

²² Ug miingon ko, "Dili ko makasaad niana, Hope, tungod kay ako—ako—ako...naguol gyud ko. Dili gyud nako kana mapugngan."

²³ Ug nanumbalik na ako gikan sa maong panan-awon, nga nagatindog didto sa mangitngit nga lawak. Ug dili kadto usa ka panan-awon, ni imahinasyon, pero nabati nako nga nakagakus gihapon siya sa ako. Ug iya kong ginatapik. Sa hunahuna ko, "Kadali lang. Dili kini..." Wala pa ko mahibalo kung unsay tawag niini niadtong panahona, nga usa diay ka panan-awon. Gitawag ko kini kaniadto og dolodamgo. Miingon ko, "Kini mao'y...Naa lagi gihapon iyang kamot." Miingon ko, "Ania ka ba dinhi, Hope?"

²⁴ Ingon niya, "Bill, isaad kanako nga dili na ka mabalaka pa kanako ug kang Sharon." Tungod, atua na man gud ko niadto sa kinatumyan sa akong panaw. Maghikog na unta ko niadto.

Miingon ko, "Ginasaad ko kanimo." Ug iya kong gigakus, ug iya kong gitapik sa iyang kamot.

Ug dayon ako—miingon ko, "Hope, asa man ka?" Akong... nabati, hangtud akong nagunitan kadtong gamay'ng kadena sa suga ug ako kadtong gibira. Gisusi ko ang palibot, akong gitana-aw ang matag lingkoranan, aron makita kung atua ba siya didto nagalingkod.

Siya'y Dios. Ingon Siya ka Dios sa gihapon, karon, sama sa kung unsa Siya kaniadto didto sa Bukid sa Pagka-usab kaniadtong mipakita si Moises ug Elijah. Nagpabilin gihapon Siya nga Dios.

²⁵ Moagi man kita sa daghang problema ug mga pagsulay. Hinumdumi lang, nga adunay Usa Nga nahibalo, og nagalamdag sa dalan, nga ginahimo kini nga tinuod. Wala ko masayod kung unsa gayud ang anaa sa luyo sa tabil. Apan nasayod ako sa usa ka butang, nga nagapadayon ako paingon sa daganan ngadto sa labing hataas nga pagtawag, sa matag adlaw, nagapaningkamot nga magkinabuhi alang nianang dakung panghitabo nga mahitabo sa umalabot nga adlaw sa dihang makita ko na Siya, nawong sa nawong, ug isugid ang maong estorya nga, "Naluwas ako tungod sa grasya." Kana ang adlaw mao nga ako nagakinabuhi. Nga ginatalikdan ang mga butang nga nangagi na, nga mao'y sa karon, gusto kong magpadayon, nga magpadayon.

²⁶ Gusto ko niining tabernakulo, kamo karon nga nagapanindog, gusto ko kamong magpadayon nga magpadayon paingon ngadto sa labing hataas nga pagtawag. Bisan unsa man ang inyong buhaton, managhiusa kamo, paningkamotan ninyo nga mahimong pamilya sa usa'g usa, pero kanunay gayud nga andam, sa pagkab-ot ug pagkuha sa uban, aron dalhon

sila pasulod. Apan sa niining Pagtoo nga atong ginawali karon ug ginapakiglimbasugan sa pagpanalipod, ayaw gayud pag-irog palayo bisan og usa ra ka pulgada gikan Niini. Kay, kung nagatoo kamo kanako ingon nga Iyang alagad, mao gyud kini ang programa sa Dios. Dili gayud kini mopaingon sa mayorya. Apan kanunay kining maanaa sa minoriya, sa una pa ug magpabilin pirling ingon niana. Pero, hinumdumi ninyo, nahisulat kini, “Ayaw kahadlok, diyutay’ng panon; sa maayong kabubut-on kini sa inyong Amahan nga igahatag kaninyo ang Ginghamarian.”

²⁷ Karon, adunay grupo sa mga katungdanan sa atong iglesia, mga diyakono, mga tinugyanan, Sunday school superintendent, mga pastor, maingon nga ang atong iglesia gipahimutang sa kahan-ayan. Ug kamong, mga katawhan, ang nagpili niining mga opisyaes ug niining pastor. Usa lamang ako ka pangkadaghanang tigdumala, nga ginasiuro nga nagapadayon kini nga husto, ug aron maghatag og tambag ug uban pa. Kamo ang nagapili sa inyong pastor, kamo ang nagapili sa inyong mga tinugyanan, kamo ang nagapili sa inyong mga diyakono, kamo ang nagapili sa matag opisina nga anaa niining iglesia; kamong, mga miyembro. Ug katungdanan ninyo nga suportahan kana nga mga kalalaken-an, kita n’yo, tungod kay masayup gihapon sila. Mga mortal ra man sila. Mga tawo lamang sila, ug makabuhat gihapon sila’g mga sayup. Apan kung ang Presidente sa Estados Unidos makahimo’g sayup, palagputon ba nato dayon siya, sa pagka-Presidente? Ginakalimtan lamang nato kini ug nagapadayon. Ingon niana ang atong gustong buhaton sa atong iglesia karon. Gipaminawan nako siya nga nag-ampo, pipila ka minuto ang milabay, alang niining mga diyakono. Ug ang madungog pud kadto didto, ang pagpamatuod, dinha sa pultahan, gikan sa mga tinugyanan, kung unsa ka nagkahiusa kamong tanan. Karon pagpabilin kamo nga ingon niana. Karon, kamong mga miyembro suportahan ninyo kining mga tinugyanan, mga diyakono, ug ang pastor. Ug hinumdumi, pagmaabot na ninyo kana nga panagkahiusa, hinumdumi nga buluhaton sa yawa nga siguradohon nga mabungkag kana. Karon ingon na niana kini sa una pa ug magpabilin kini nga pirling ingon niana. Pero suportahan ninyo ang inyong mga opisyaes, ug mao kana ang hilisgutan nga akong pagahisgotan.

²⁸ Ug dayon aduna usab ako dinhi. . . adunay usa ka butang ako dinhi para sa bulletin board karong buntag, mahitungod sa pakigpulong sa mga diyakono ug ilang awtoridad. Ug igabutang kini diha sa bulletin board. Ug naa ko’y kopya para kang Igsoong Roberson, nga mao ang tigpangulo sa de- . . . sa mga tinugyanan. Ug ania pud ko’y kopya alang kang Igsoong Collins, nga sa hunahuna ko, siya ang naglingkod ingon nga tigpangulo sa mga diyakono. Ug karon, kining tanan nga mga katungdanan gihan-ay sumala sa Kasulatan, ug kinahanglan aduna sila’y

mga lagda subay sa Kasulatan kon unsay kinahanglan nilang buhaton. Tungod niini, ang mga tinugyanan aduna sila og ilang kaugalingong katungdanan. Ug ang mga diyakono adunay ilang kaugalingong katungdanan. Ang Sunday school superintendent aduna pu'y iyang kaugalingong katungdanan. Ug ang pastor mao ang ulo sa panon.

²⁹ Karon, ang matag usa niini adunay mga butang nga managsama ra. Ug sa akong tan-aw dili angay hiusahon ang inyong pakigpulong, apan ipahigayon kini kinahanglan ingon nga sa matag opisina, tungod kay ang mga diyakono walay kalabutan sa mga tinugyanan gawas kon sila adunay buluhaton nga ipresentar ngadto kanila. Ug mao usab ang mga tinugyanan, sila mao ang tigdumala sa pinansyal ug mga butang nga may kalabutan sa bilding; wala pud sila'y kalabutan sa mga diyakono. Ang mga diyakono mao'y mga pulis sa iglesia, ug ang mga kaabag sa pastor. Ug ang mga tinugyanan mao'y nagadumala sa tanang kabtangan. Wala sila'y kalabutan sa espirituhanong bahin, ug ang diyakono wala pu'y kalabutan sa pinansyal nga bahin niini. Busa, kinahanglan nga ingon niana gyud kana. Ug ang Sunday school superintendent mao pu'y tigdumala sa Sunday school. Busa naipasulat na nako kining tanan, napamakinilya na, aron ibutang kini diha sa bulletin board.

³⁰ Ug dayon ato kining, ipa-kuwadro, ang Doktrina nga ginabarugan sa iglesia, ug ipabutang nato Kini dinhi, sa simbahan; kung unsay atong ginabarugan, ang—ang mga prinsipyo, ang Doktrina sa iglesia. Karon, aron mahimong usa ka iglesia, kinahanglan aduna kita'y usa ka doktrina.

³¹ Wala kita nagabutang og mga ugsok, ug moingon nga, “*Dinhi lang ta taman.*” Nagapakipag-fellowship kita sa tanang, mga tawo, kutob sa atong mahimo, kung unsa ang igatugot sa Dios kanato, sumala sa Iyang Kasulatan. Ug magpabilin gyud kamo nga magkauban, nga nagakahiusa, nga usa ra ang kasingkasing, ug magpadayon sa Dios. Ingon niana ang gusto sa Dios nga atong buhaton.

Karon mag-ampo kita, ug dayon ablihan nato ang Pulong.

³² Oh minahal namo nga Ginoo, magaduol na kami karon sa Balaang Pulong, o magabasa na kami niini nga Pulong. Hinaut nga hubaron sa Imong Balaang Espiritu nganhi kanamo ang among gikinahanglan. Ug tugoti nga managsulti kami, Ginoo, ug magapanglihok ug magkinabuhi, sa pagkahibalo nga kaming tanan Imong mga anak, pinaagi sa grasya, ingon nga Imo kaming gitawag. Hinaut nga adunay panaghiusa sa niini nga iglesia, ingon nga makita namo nga nagakahaduol na kami ngadto sa usa ka dakung kalihokan, mabati namo, nga ginaawhag na Nimo ang uban pang mga ministro aron moadto sa mga pag-misyon diin, kung Imo man akong ipadala ngadto sa nagkalain-laing

mga dapit sa kalibutan, aron ipahiluna didto ang maong Pagtoo, ug makabaton og usa ka ministro nga andam ug matinguhaon, ug hinanas aron magdumala. Ug hinaut nga ang maong Pagtoo nga sa makausa pa gikatugyan ngadto sa mga balaan, nga maisogon namong ginabarugan, mokaylap sa tibuok kalibutan. Itugot kini, Ginoo. Hinaut nga kining gamay'ng tapok sa sagbot, sama niadtong adlaw nga amo pa kining gipahinungod Kanimo, hinaut nga adunay usa ka iglesia nga magabarug dinhi, Ginoo, nga gikan niini manggula ang mga ministro ug mga ebanghelista ug mga magtutudlo ug mga misyonario, ngadto sa tanang bahin sa kalibutan.

³³ Ginapangamuyo namo, karong buntaga, ang espesyal nga panalangin alang sa among Igsoong lalaki ug Igsoong babayeng Stricker nga nanag-antus karon. Apan nasayod kami nga kaming tanan ginabutang sa niini nga mga pagsulay. Kay ang matag anak nga nagaduol sa Dios kinahanglang mapanton, masulayan. Ug kon kami mosurender dayon, ug motalikod, nan kami mga anak diay sa gawas, ug dili mga anak sa Dios. Hatagi'g kusog ug gahum si Igsoong lalaki ug Igsoong babayeng Stricker, aron makalahutay sila sa ilang katungdanan. Kung kinahanglan man nilang mohangyo alang sa ilang pagakan-on, Itugot nga ang Imong kamot sa panalangin maanaa kanila. Kay wala kami mahibalo apan pinaagi sa maong paningkamot tingali Imong maipakita sa mga lumad sa Africa kung unsa ang tinuod nga Cristohanon. Itugot kini, Ginoo. Karon itugot nga mamatuman kini sumala sa Imong kabubut-on.

³⁴ Panalangini kining pastor, nga si Igsoong Neville. Nagaampo kami, Ginoo, nga Imo siyang himoon nga usa ka magbalantay sa panon, sama sa Imong gibuhat kaniadto. Ug dili pud namo kalimtan ang iyang matahum, luoy'ng asawa nga masakiton kaayo. Gusto sa kaaway nga ibilin kang Igsoong Neville kanang pundok sa mga bata, nga wala na'y inahan, apan nagabarug kami ug ginapahimutang, ang Dugo ni Jesus Cristo tali sa maong kaaway ug sa among igsoong babaye, pinaagi sa pagtoo. Hinaut nga ang Imong Espiritu, Ginoo, mamahimong gamhanan diha kaniya, ingon nga kami nasayod nga ang tanang mga babaye gikatagana na nga magaagi nianang walog, sa kangitngit niining kapanahonan, apan kami nagaampo nga Ikaw magauban kaniya. Panalangini kanang mga anak niya. Nanaghigwaos siya karon, ug magul-anon, apan hinaut nga maanaa sa pultahan sa kalooy ang Espiritu Santo, sa tanang panahon, alang niana nga pamilya.

³⁵ Panalangini ang among hunta sa mga tinugyanan, ang among Igsoong Wood, ug ang among Igsoong Egan, Igsoong Roberson, ug ang tanang uban pa, Ginoo. Ang mga diyakono, mga tinugyanan, ug ang tanan nga kaabag sa iglesia, nagaampo kami, Ginoo, nga Imong tugotan sila nga humanon ang ilang termino nga may pagkabalaan ug—ug pagkamatarung.

Panalangini sila, Ginoo, kadtong mga nangalagad sa nangaging mga panahon. Ug nagaampo kami nga Ikaw magapadayon sa pag-uban kanamong tanan, nga maila kami nga iglesia sa panaghiusa, ug Espiritu ug gugma sa Ginoo. Nagaampo kami karon nga Imong bahin-bahinon kanamo ang Pulong, sumala sa among gikinahanglan, samtang among basahon ang Imong sinulat nga Pulong. Kay amo kining ginapangamuyo sa Ngalan ni Jesus. Amen.

³⁶ Ug diha sa pag-ampo, naghunahuna ko samtang atong gipanalanginan o samtang nagapangayo og mga panalangin alang sa atong modernong...sa atong bag-ong hunta sa mga tinugyanan ug uban pa, nahunahuna nako ang atong Igsoong Fleeman ug Igsoong Deitzman ug ang uban pa nga naglingkod dinhi, nga nakapangalagad og maayo, kaniadto. Ug mapasalamaton kita sa Dios tungod sa ilang matinuuron nga pagpangalagad. Hinaut nga ang Ginoo sa kanunay magauban kanila, aron mapanalanginan ug matabangan sila. Gusto kong magbasa adisir...Timan-i n'yo, ang bulletin board ug uban pang pahibalo, ug ang bahin sa umalabot nga mga panagtigum.

³⁷ Ug malipayon kita nga kauban nato, karong buntaga... Bueno, tugoti akong ipahayag lang kini sa niining paagiha, usa ka tawo nga bililhon kaayo kanako, kaniadto, ug padayon nga bililhon kanako karon, usa ka maayong igsoon, si Fred Sothmann, nga gikan sa...ug ang iyang asawa, nga taga-Saskatchewan, Canada, nga ania karon aron temporaryong magpuyo uban kanato, sa atong nasud, siya'y usa ka lumalangyaw; apan sa atong panagtigum, siya'y usa ka minahal nga igsoon, si Igsoong Fred Sothmann nga nagalingkod dinha. Siya ang nagadumala sa akong mga buluhaton sa dihang atua pa ako sa Canada.

³⁸ Ug usa pa ka bililhon nga igsoong lalaki nga usa usab ka Canadian kaniadto, usa ka negosyante, ug makapamatuod sa kalibutan nga dili gayud nimo matupngan ang pagkamanggihatagon sa Dios. Siya ug ang iyang higala nagtukod og usa ka foundation alang sa panalapi sa pagtukod og pasilidad, o para sa pagpang-misyon ngadto sa ubang nasud, usa ka foundation. Ila kong gipatawag sa Oakland, para sa usa ka panagtigum, ug gipahibalo nako nga naa kono sila'y pundo. Sila kono ang magpangabaga sa tanan, pinaagi sa ilang foundation.

³⁹ Si Igsoong Fred ug ako misulay sa paggamit sa pipila ka pondo ni Igsoong Fred, nga dili nako dawaton ingon nga usa ka indibidwal. Busa nagdesisyon kami nga igasto kini ngadto sa mga taga-Canada ug wala gani kami nangolekta og mga halad, apan wala kini nagbunga og maayong salangputan. Ang mga panagtigum maayo man. Apan tungod kay wala kami nangolekta og alang sa halad...Dili ko igsapayan bisan usa pa ka gatus ka bilyon dolyares ang bili sa simbahan, obligasyon

gihapon ninyo kini, sa Dios, nga mangolekta og offering. Kabahin kana sa pagsimba. Ug imong gihikawan. . . Bisan pa nga ako batok gyud sa salapi ug mga butang nga ingon niana, akong naamgo, nga pagnasayup ang usa ka tawo, mas maayo nga angkonon mo nga nasayup ka, kay nasinati na namo kini ni Igsoong Fred nga dili gyud kini maayo.

⁴⁰ Ug, Igsoong Borders, sa dihang gibiyaan ko si Igsoong Fred ug miadto ko sa imo didto sa Oakland, miingon ko, “Ayaw kana buhata. Ipatuyok lang kanang butanganan og koleksyon, ug magkuha gyud og offering, ug, unsa man kini, ibalik kini sa imong foundation para sa laing panagtigum kung asa man.”

⁴¹ Ug sa wala pa matapos ang panerbisyo, miduol kanako si Igsoong Border ug iyang mga higala, ug miingon, “Ang tanan nga atong galastuhon sa—sa panagtigum, nakolekta na.”

⁴² Ug dayon, pipila ka adlaw ang milabay, nag-organisar siya og panagtigum para didto sa San Jose, California, diin aduna siya, siguro og kan-uman o kapitoan ka mga kasimbahanan didto sa walog, nga nagrepresentar sa nagkalainlaing mga tinooan ug tanan sila nagtinabangay. Nagkaaduna kami og maanindot nga panagtigum, ug mobalik kami pag-usab, sa Nobyembre. Nalipay kami nga nakauban kamo namo, Igsoong Borders ug Igsoong Fred nga nagalingkod dinha sa luyo. Ug tingali dili n’yo kaila kining mga tawhana, apan sila mga bililhong mga igsoon alang kanako didto sa natad sa mga pagmisyon, nga nakigbisog sa pagpanalipod alang sa Pagtoo nga atong ginabarugan. Ang Dios magapanalangin kanimo, igsoon. Malipayon kami nga makauban kamo karong buntag, sa gamay, karaan nga tabernakulo dinhi. Dili kaayo kini maanindot tanawon. Apan adunay usa ka butang dinhi, nga, nasayod kita nga ang Dios nagpuyo dinhi, nakita n’yo, busa malipayon kita alang niana. Ug aduna pa’y ubang bililhong mga kaigsoonan, nga kauban kanato karon, kung aduna pa unta ko’y panahon nga mapaila-ila.

⁴³ Karon nagapaabot ako ug nagaampo nga sa sunod nga mga adlaw, kung itugot sa Ginoo, gusto kong moadto, kay gibati kong giniyahan. . . Wala pa nako kini gipahibalo. Nga ang sunod nga panagtigum, didto kini sa Ohio, kang Igsoong Sullivan, didto sa campgrounds, sulod sa hamubo ra nga panahon. Mga usa ra ka gatus ka milya ang gilay-on niini, siguro, Gene, nga mga ingon niana. Nindot gyud kini nga pagbiyahe, kung wala pa ninyo naplano ang inyong pagbakasyon, kung padayon kitang pagagiyahan sa Ginoo. Maayo kaayo nga tawo, ug ginapasalamatan nato si Igsoong Sullivan, pag-ayo. Usa siya. . . Siya ang mayor sa siyudad. Usa siya ka mayor kaniadto, ug usa ka tradisyonal nga taga-Kentucky. Mao lang kana ang akong masulti mahitungod niya. Sa dihang nahimamat nako siya sa miaging adlaw. . . Pareho kaming nagdaku didto sa mga kabukiran sa Kentucky. Miingon siya kanako, “Nagabutang

pa ba gihapon ka og asafetida sa imong liog, Billy?” Karon mahibaloan nimo nga—nga taga-Kentucky gyud siya. Karon atong ablihan. . .

Dili kini sa walay igong pagtahud sa akong mga kaigsoonan nga mga taga-Kentucky dinhi, si Igsoong Jefferies, ug uban pa. Kay ako taga-Kentucky, pud, kabalo mo. Isulti nako kaninyo kung unsa gyud kita. Dili kita mga taga-Kentucky, o dili pud kita mga Amerikano. Kita mga magpapanaw ug mga estranyo dinhi. Nagapaabot kita alang sa usa ka Lungsod.

⁴⁴ Karon alang sa pagbasa, magbasa kita gikan sa Basahon sa Exodo, sa pipila ka gutlo. Gusto nakong basahon gikan sa ika-23 nga kapitulo, diha sa ika-20 nga bersekulo ngadto sa ika-23, ang mga sulod niini. Ug gusto kong mokuha og usa ka teksto karong buntaga, gikan sa ingon niini, bahin niini, diay: *Usa Ka Hingpit Nga Kaluwasan*. Ug dili ako magdugay, sa pagpamulong, ug karon samtang nagahulat ako nga inyong ablihan ang inyong Libro ug kapitulo.

Ania karon, ginasugo ko ang usa ka Manulonda sa atubangan mo, aron sa pagbantay kanimo sa dalan, ug sa pagdala kanimo ngadto sa dapit nga akong gitagana.

Magbantay kamo sa atubangan niya, . . . magpatalinghug kamo sa iyang tingog, dili ninyo pagsuk-on siya; kay siya dili magapasaylo sa inyong paglapas: kay ang akong ngalan anaa kaniya.

Sigurado ako nga nahibalo na ang kongregasyon kung Kinsa kini nga Manulonda. “Ang akong Ngalan anaa Kaniya.”

Ug kung sa pagkamuod nga magapatalinghug ka sa iyang tingog, ug pagabuhaton mo ang tanan nga akong igaingon; nan mamahimo akong kaaway sa imong mga kaaway, ug magabatok ako sa imong mga kabatok.

Kay ang akong Manulonda magalakaw sa unahan mo, ug pagapasudlon ka niya . . . sa Amorehanon, . . . sa Hetahanon, . . . sa Persehanon, . . . sa Canaanhon, . . . sa Hebehanon, ug . . . sa Jebusehanon: ug ako magalaglag kanila.

⁴⁵ Hinaut nga panalanginan sa Ginoo ang Iyang Pulong samtang magapamulong kita karon sa pipila ka gutlo, kung magampo kamo. Naghunahuna ko niini nga hilisgotan, sa: *Usa Ka Hingpit Nga Kaluwasan*.

Ang Iglesia dugay nang anaa sa—anaa sa minoriya. Ingon niana kana sa kanunay, sa mga miyembro, hangtud sa pag-abot ni Jesus. Apan nagakinabuhi Kini ilalum sa mga pribilehiyo nga hinatag-sa-Dios Niini. Kung nasayod lang kita, kini mao ang Iglesia sa buhi nga Dios; dili ang Branham Tabernacle, kondili ang Branham Tabernacle mao’y kabahin lang Niini. Adunay uban pang ingon niini nga mga tabernakulo sa tibuok nasud.

46 Si Igsoong Snelling, unyang gabii, magpahigayon siya'g panerbisyo sa pagbautismo. Nakalimot ko nga gisultihan diay ko ni Igsoong Curtis nga ipahibalo kana, o gisultihan ako kagahapon, nga adunay ingon-ana nga buluhaton. Aduna siya'y igapahigayon nga panerbisyo sa pagbautismo. Ug kung aduna ma'y wala pa nabautismohan, dinhi, aba, malipay gayud si Igsoong Snelling sa pagbuhat niana, unyang gabii. Ang Holiness Tabernacle kana didto sa Utica. Ug kang Igsoong Junior Jackson, sa New Albany. Ug adunay daghang ingon niana nga mga kasimbahanan sa tibuk nasud. Pero kitang tanan nagkinabuhi, nga mora ba'g, anaa sa dapit sa kapildihan, mora'g ingon-ana.

47 Nadungog nako si Igsoong Neville nga nagsulti niini karong buntaga, didto sa luyo, nga mora'g misantop sa akong hunahuna, nga ang mga tawo daw sa nagapahilayo na gikan sa kaluwasan. Kini daw sa usa ka butang, nga, nakita na mismo kini sa mga tawo, apan ilaha lang kining ginapadaplin sa usa ka kilid, "Oh, bueno, mahimo gyud kini sa Dios." Apan dili ingon niana ang ilang taras.

48 Karon, si Moises, kaniadtong gitawag siya sa Dios, usa siya ka hingpit, bug-os nga propeta.

Pagmopadala ang Dios og usa ka tawo aron buhaton ang unsa mang butang, siya bug-os ginasangkapan sa Dios sa tanan niyang gikinahanglan. Kung ginatawag sa Dios ang sa usa ka tawo aron mahimong usa ka magwawali, Siya nagabutang og usa ka butang diha kaniya aron siya makawali. Kung Siya nagatawag kaniya nga mamahimong magtutudlo, nagabutang ang Dios kaniya og usa ka butang aron siya makapanudlo. Kung ginatawag Niya siya nga mamahimong propeta, nagabutang pud Siya og usa ka butang diha kaniya, aron makakita siya og mga panan-awon ug mamahimong propeta. Kanunay ang Dios bug-os nga nagasangkap sa Iyang alagad.

Ug mao kana ang Iyang gibuhad sa diha nga Iyang gipadala si Moises ngadto sa Egipto. Iya siyang gipadaku sa usa ka pamaagi. Ug Iya siyang gitudloan sa usa ka pamaagi, ug Iya siyang giuamol, ug giporma, ug gidisenyo. Human nga Siya misaad kang Abraham kaniadtong, gatasan ka mga tuig nga wala pa kadto, nga Iyang pagawason ang mga katawhan, dayon Siya—anaa na sa Iyang hunahuna nga Iyang himoon si Moises eksaktong sama sa kung giunsa pagbuhat kang Moises. Si Moises usa ka hingpit nga propeta. Ug dayon, ingon nga usa ka hingpit nga propeta, dayon. . .

49 Sama kanimong, kung ikaw usa ka Cristohanon, ang Dios wala nagahimo og alang-alang nga mga Cristohanon. Ang Dios nagahimo og hingpit nga mga Cristohanon. Ang Dios wala nagahimo og alang-alang nga mga magwawali, apan puede ang magwawali nga mamahimong alang-alang. Ug ginahimo sa Dios ang Iyang mga anak nga mga Cristohanon, apan usahay

sila mga alang-alang nga Cristohanon. Pero dili tuyo sa Diyos nga sila mamahimong ingon niana. Ila kining kaugalingong mga pamaagi nga ilang gisagol sa plano sa Dios alang sa ilang kinabuhi, ug mao kana ang nakapahimo kanila sa kung unsa sila. Dili gusto sa Dios nga sila mamahimong alang-alang nga mga Cristohanon, o alang-alang nga mga magwawali, nga nagapakigkompromiso sa bisan asa nga bahin, o . . . Gusto Niya nga bug-os silang mobarug dinha sa kal-ang.

⁵⁰ Karon, si Moises, gihimo siya sa Dios nga usa ka hingpit nga propeta, para sa usa ka hingpit nga pagluwas. Ug si Moises hingpit nga nahitugyan diha sa mga kamot sa Dios. Mao kana'y hinungdan nga nahimo siya sa kung unsa siya. Hingpit kaayo siya diha sa Dios hangtud nga makasalig ang Dios kaniya.

⁵¹ Nagahunahuna ko, karong buntaga, ingon nga mga Cristohanon, kung gitugyan na ba nato ang atong kaugalingong kabubut-on, ug gitugyan na ba nato ang atong kaugalingon ngadto sa Dios, nga ang Dios makasalig kanato sa puwesto nga Iyang gipahimutangan kanato. Nagahunahuna ko, niining buntag, mahitungod sa akong kaugalingon, kung maitugyan ko ba og ayo ang akong kaugalingon ngadto Dios hangtud nga ang Dios makasalig na kanako, makasalig na kang Igsoong Neville, makasalig na sa atong hunta sa mga tinugyanan, sa atong hunta sa mga diyakono, o sa atong mga miyembro sa atong iglesia. Kitang tanan adunay puwesto, ug kita adunay katungdanan.

⁵² Ang ministro adunay katungdanan, sa pagbarug ug sa pagwali sa dili matukib nga mga bahandi ni Cristo, nga walay pagkompromiso, kung siya gitawag nga mamahimong magwawali. Dili gyud niya palabyon bisan usa ra kini ka butang para lang sa usa ka tawo, kung siya'y ginatawag para mamahimong usa ka magwawali.

⁵³ Ug ang miyembro sa iglesia, pag-gitawag siya aron mamahimong miyembro nianang pundok, nan dili gyud siya mopakig-kompromiso. Kung ang iglesia nagatoo nga kita dili angay magsugal, kung ingon-ana ang maong miyembro dili gyud angay mohikap nianang mga baraha. Kita wala nagatoo sa pag-inum-inum og mga makahubog, kinahanglan gyud niyang ilingiw ang iyang ulo gikan nianang pag-inum-inum. Kung kita wala nagatoo sa mga pagsugal, o pagpanigarilyo, nga ang miyembro niini nga iglesia kinahanglan dili gyud mogunit og ingon nianang butang. Ang Dios nagahatag og hingpit nga pagpalingkawas. Sa dihang kita . . .

Buhaton kini Niya kon bug-os natong itugyan ang atong kaugalingon ngadto Kaniya. Kung itugyan nato sa Iyang kamot ang atong mga kaugalingon, kung ingon-ana ang Dios makapuyo na sulod kanato. Si Cristo, nga mao ang Paglaum sa Himaya, mahimo Niyang ipadan-ag ang Iyang Kaugalingon gikan sa ato kung ipadaplin lang gyud nato ang atong mga

kaugalingon. Kung ingon-ana ang atong mga hunahuna Iya nang mga hunahuna. Mahunahuna n'yo ba diay si Cristo nga nagapanigarilyo? Mahunahuna n'yo ba si Cristo nga nagainom og makahubog, o nagadula og baraha? Nan kung ang imong espiritu kabahin sa Iyang Espiritu, gusto Niya nga mahiuyon kini sa imong ginasugid. Pero ginatugotan ninyo ang yawa nga mosulod ug maoy magdumala. Ug sa tanang panahon, sa kahiladman, sa imong kasingkasing, nasayod ka nga sayup ikaw sa diha nga ginabuhat mo kanang mga butanga.

Ug kung ang usa ka miyembro mosulti og batok sa usa pa ka miyembro, nasayod kamo nga sayup kana. Gisugo kamo nga iampo ang usa'g usa, dili ang maglinibakay sa usa'g usa, kondili maghigugmaay sa usa'g usa. Ug kung adunay nagmaluyahon, ato siyang dasigon, ug tabangan siya. Karon, kana ang nagapahimo kanato nga usa—usa—usa ka gihiusang grupo sa mga magtotoo. Karon, kung dili nato kana tumanon, kung ingon-ana wala nato ginatuman ang Dios ug wala kita nakapahimuot sa Dios. Ug busa, ang atong iglesia, ang atong katawhan dili gayud mouswag, ang iglesia dili makapadayon, kay tungod kitang tanan nagkabahin-bahin, nga magkahiusa. Sama sa gisulti ni Jesus, “Usa ra ka gamay'ng pudyot sa levadura magapatubo na sa minasa.”

⁵⁴ Karon, kung ang hunta sa iglesia, o sama sa—sa ang mga diyakono, moabot ug moingon nga kita . . . naghunahuna nga kinahanglan kita magtukod og bag-ong tabernakulo. Kung mao kana ang gibotaran sa mga diyakono, ug nakonsulta na ang mga tinugyanan ug wala pa sila'y igong salapi aron mapahigayon kini, kung ingon-ana magkaaduna sila'y plano sa pagtukod sa maong bilding sama sa ginabuhat nato karon. Ug dayon dalhon kini sa tibuok kongregasyon, sumala sa angay natong buhaton, maingon nga ang tibuok iglesia adunay soberenya. Dayon kung ang iglesia mobotar alang sa bag-ong tabernakulo, kung ingon-ana kitang tanan kinahanglan magtinabangay sa pagtukod nianang bag-ong tabernakulo.

⁵⁵ Sa tinuod lang, sa ako, niadtong gihisgotan nila ang mahitungod sa bag-ong tabernakulo, para sa ako, dili ako uyon niadtong plano. Husto kana. Miingon ko, “Dili man nato kinahanglan nga magkaaduna pa og bag-ong tabernakulo. Tingali motaliwan na ako dinhi sa dili madugay, ingon nga ang Ginoo . . . kung mahitabo man ang gipakita Niya kanako. Para sa unsa pa nga magkinahanglan kita og bag-ong tabernakulo? Wala man ta'y pondo.”

⁵⁶ Dayon mianhi ko ug nabati ko ang pagbati sa iglesia, nga ang iglesia, ang kadaghanang miyembro niini, mora'g gusto nila kini. Dayon unsa man akong gibuhat? Gisakripisyo nako ang akong kaugalingong mga hunahuna ug nakigduyog ko sa iglesia. Sige, buhaton nato kini. Kung . . . Sa ingon nianang paagi kita nagabotar, mao kana ang paagi kaniadtong panahon

pa sa Biblia, ang paagi nga nagabotar ang iglesia. Ang—ang pagkasoberanya, mga pundok sa mga tawo, nga nagkahiusa. Ug sa panaghiusa adunay kalig-on. Maong, busa, miingon ko, “Sige, kung mao kana ang gusto sa iglesia, kung kana ang gusto sa Dios, Siya adunay labaw nga awtoridad sa pagbotar taliwala sa tibuok grupo sa mga tawo kay sa Iyaha kanako, tungod kay wala man ako’y panan-awon aron moingon nga dili kini puede.” Busa kita kinahanglan makig-alayon sa iglesia ug modesisyon kauban sa iglesia. Ug ako nagapaluyo gyud niini, aron buhaton ang tanan nga akong mahimo, kita n’yo, aron matabangan ang iglesia.

⁵⁷ Ingon niana ang angay nga motibo sa matag Cristohanon ug matag tawo sulod sa iglesia, ang magkahiusa ang atong mga kaugalingon ug magpabilin gyud nga magkauban. Bisan unsa ma’y giuyonan sa iglesia, mao kana ang angay natong barugan. Dayon isulti na lang nato, pananglitan, ang . . .gusto nga adunay bag-ohon sa iglesia. Bueno, dayon, kung ang mga tinugyanan gusto nga, ang . . .adunay ma’y gusto nga, ang mga diyakono, aduna sila’y gustong bag-ohon, ipresentar kana atubangan sa iglesia, dayon desisyonan kana sa tibuok iglesia. Ug kung ang atong—kung ang atong ideya dinhi mora’g lahi kaysa kung unsa ang giuyonan sa tibuok iglesia, atong isakripisyo kana nga ideya, tungod kay mao ra kana ang paagi nga magkahiusa kitang tanan. Ug kung kini nga iglesia magpadayon sa gihapon sa kung unsa kamo karon, ug nga magkahiusa, ang Dios. . . Walay limitasyon, kung unsa ang Iyang pagabuhaton, kung magpabilin lang gyud kita nga magkauban. Kinahanglan gyud nga kanunay’ng magpalibin kita nga magkauban. Ingon niana ang atong gustong mahitabo, nga kumpleto kaayo sa usa’g usa, ug dayon kumpleto kaayo diha sa mga kamot sa Dios.

⁵⁸ Dayon kinahanglan nga aduna kita’y usa ka tawo nga atong ginatoohan nga nagawali sa Pulong sa Dios. Kung dili kana buhaton sa maong tawo, kung ingon-ana pangita mo og usa nga makahimo niini. Kinahanglan sa ingon niana nga paagi kita nagabarug. Kung ang hunta sa mga tinugyanan dili mobarug sa kung unsa ang husto, kung ingon-ana inyo kanang katungdanan nga mopili og usa ka tawo nga mobarug alang sa kung unsa gayud ang husto. Ug dayon pagnabuhat ninyo kana, pagpabilin kamo niana. Nakadepende kana kaninyo. Barugan ninyo kana. Ug, kitang tanan, nagabarug kita sa usa ra ka Butang, nga mao ang Dios.

⁵⁹ Kung makabuhat man og sayup ang usa ka miyembro, ayaw siya isalikway. Tabangi siya. Pabangona siya. Magpakigpulong kamo, nga ginapaminaw ang usa’g usa. Mao kana ang ginaingon sa Kasulatan. Pagnakabuhat kita’g sayup, modangup kita sa atubangan sa Dios. Sa dili pa kita modangup sa atubangan sa Dios, kinahanglan nga moduol usà kita sa tawo nga atong napasakitan.

⁶⁰ Kinahanglan gyud nakong buhaton kana. Ug nasayod ako

nga nakabuhat ako'g sayup. Namakak ko, hinungdan nga nakapamakak usab ang akong asawa. Nagtoo ko nga gisultihan ko na kamo bahin niini, dinhi sa simbahan. Pipila pa lang kadto ka adlaw, dili pa lang dugay, mga unom ka semana siguro ang milabay. Ginahasol gyud ako og ayo sa mga abogado, tungod niining imbestigasyon, hangtud nga halos wala na ako mahibalo kung asa na ko. Bag-o lang ko niadto nakauli gikan sa opisina, aron manihapon. Ug nag-ring ang pribadong numero sa telepono, ug si Meda ang miadto aron tubagon ang telepono. Ug iyang gisampungang kini sa iyang kamot, miingon, "Sila na pud nga mga abogado."

⁶¹ Miingon ko, "Dili ko na madawat ang usa na usab ka gabii nga ingon niana. Mora'g mabuak na ang akong ulo. Mora na ko'g mabuang, nga ginapiut ako sa niining paagi, ug sa ingon nianang paagi, ug sa ingon niining paagi." Miingon ko, "Dili ko na maagwanta kini." Ug mitindog ako, ug miingon, "Ingna sila nga wala ko dinhi," ug miadto ako didto sa luyo sa balay.

⁶² Pagbalik nako. . . Nakonsensya kaayo si Meda niadtong mga butanga. Gisugat ko niya sa pultahan, nga kahilakon. Ingon niya, "Bill, husto ba kadto nga buhaton?"

⁶³ Kaila gyud mo kung unsa kamo. Nakaila pud ko kung unsa ako. Miingon ko, "Oo. Wala man ko dinhi ganina." Nasayod ko nga gikondena ko sa Dios tungod niadto. Miingon ko, "Wala man ko dinhi ganina."

Miingon, "Pero anaa man ka dinhi kaganina niadtong nanawag kadtong tawo."

⁶⁴ Nianang hapon miadto ako aron sa pag-ampo alang sa masakiton nga bata. Ug sa wala pa ko migikan sa balay, nag-ring na pud ang telepono, ug ang akong anak nga si Joseph midagan ug gihawiran kadtong telepono ug miingon, "Daddy, gusto ba nimong sultihan nako sila nga wala ka dinhi?" Nakita n'yo kung sa unsang paagi makatakud ang sala, unsa na lang ang mahitabo sa usa ka pamilya?

⁶⁵ Ang unang Juan, sa ika-5 nga kapitulo, ug sa ika-21 nga bersekulo, nag-ingon, "Kung ang atong mga kasingkasing wala magasaway kanato, kung ingon-ana may pagsalig kita sa Dios." Pero kung ang atong mga kasingkasing magasaway kanato, unsaon nato pagsalig sa Dios? Nasayod kita, nga basta aduna kita'y sala nga wala maisugid, dili gyud Niya kita patalinghugan. Bug-at kana, pero, kini—kini—kini, ang iglesia nagkinahanglan niining mga butanga.

⁶⁶ Dayon nagsugod ko sa pag-ampo alang niadtong bata. Ug sa dihang ipandong ko na ang akong mga kamot niini, gibadlong ko sa Ginoo ug miingon, "Namakak ka. Dili ka takus mag-ampo alang niana nga bata."

⁶⁷ Mitalikod ko sa lalaki. Miingon ko, "Sir, maghulat lang sa ka dinhi. Naa ko'y butang nga kinahanglan ko usa itul-id."

68 Gitawagan nako ang abogado ug miadto ako sa opisina, gipaadto siya. Miingon ko, “Naku sir, nakapamakak gyud ako. Gisugo nako ang akong asawa nga mamakak. Gisulti niya nga wala ako didto, ug ang gibuhat nako miadto hinoon ko sa luyo sa balay.” Ug gisugid nako kadto ug gisultihan nako siya bahin niini.

69 Miduol siya ug giakbayan niya ako. Ingon niya, “Igsoong Branham, sa una pa ako misalig kanimo, pero mas samot pa akong misalig karon kanimo, lalaki gyud ka,” ingon pa niya, “nga andam itul-id ang iyang mga sayup.”

70 Gisultihan nako siya, miingon ko, “Kaganina sa nag-ampo ako alang sa usa ka bata, ug ginasaway ako sa Ginoo, sulod sa akong kasingkasing, tungod kay ako nasayod nga ako nakahimo og sayup.”

71 Dayon, pagkasunod adlaw, miingon ang akong asawa, “Asa ka moadto?”

Ingon ko, “Sa akong langub.”

72 Ug miadto ko sa akong langub, didto itaas sa Charlestown, diin ako nagaadto, sulod sa daghan nang mga tuig. Misulod ko didto, ug nag-ampo ko sa tibuok adlaw, “Oh Dios, ayaw na ako tugoti nga makabuhat pa og ingon niadto pag-usab. Pasayloa ako, Ginoo, kay sa dihang akong ipandong ang akong mga kamot diha sa mga masakiton, alang sa pag-ampo, dayon gisaway gyud ako.” Mga alas tres sa hapon, migawas na ko. Adunay usa ka daku nga bato nga atua didto. Ug mitungtong ako sa maong bato ug mihangad sa direksyon sa sidlakan, nga gipataas ang akong mga kamot, nga nagadayeg sa Ginoo. Ug pagkahilum kaayo didto. Ug miingon ako, “Ginoo, kung Imo lamang itugot. . . Usa niana ka higayon kaniadto miagi Ka sa atubangan ni Moises, ug miingon si Moises usa kadto. . . sa dihang gibutang Mo siya didto sa liki sa bato, ug nakita nga mora kadto og likod nga bahin sa usa ka tawo.” Miingon ko, “Mahimo ba Nimo kini pag-usab, Ginoo? Ipahibalo sa ako nga gipasaylo na ako.” Ug miingon ko, “Kung tabangan Mo unta ako ug mosulod sa akong hunahuna. . .” Miingon ko, “Ginoo, wala ko’y kasarang, sa pangisip, tungod kay wala ko’y igong edukasyon.” Ingon ko, “Ug ako—naningkamot lamang ako para mag-alagad sa Imo. Nasayod Ka sa akong kasingkasing, ug wala ko. . . Wala unta nako gibuhat kadto. Wala nako tuyoa nga buhaton kadto. Grabe lang gyud kasakit akong ulo niadto, ginerbiyos na ako niadto, ug nahinayak lang gyud ko sa pagbuhat niadto sa dihang nalit-ag ko ni Satanas.” Miingon ko, “Kung pasayloon Mo ako, tugoti ako nga makakita Kanimo, kung ingon-ana, Ginoo.”

73 Ang Dios ingon nga mao ang akong Maghuhukom; didto mismo sa tupad nako, usa ka gamay’ng luna sa mga sagbot nagsugod sa pagtuyok-tuyok sama sa usa ka Hangin, ug mipaingon Kini mismo sa kilid sa langub kung asa ako niadto,

ug midiretso na didto sa kakahoyan. Oh, igsoon, usa ka pakigdait nga labaw sa tanang pagsabut milukop kanako, ug nihilak ko. Mihilak ako. Misinggit ako. Nasayod ko nga ang akong mga sala gipasaylo na. Kita n'yo, wala ako mahiusa sa Dios, maong dili ako makabaton og pagkaayo alang sa maong bata.

⁷⁴ Ako . . . Ug pagkasunod nga adlaw adunay usa ka tawo gikan sa Chicago, nga usa ka inila nga tawo, usa ka Katoliko nga bag-o lang nakabig, ang mga balbula sa iyang kasingkasing nanghubag na sama sa gipaburot nga interyor sa ligid, ug dugay na nilang gisulayan sa tangtangon kadto, operahanan na unta kadto, ug wala lang motugot ang maong lalaki. Sa katapusan nahatagan siya og kahigayon para sa usa ka pagpakighinabi. Sa niining mga pagpakighinabi, mopabilin kami didto hangtud hingsayran namo kung unsa gyu'y problema. Ug pagsulod mismo sa maong tawo didto, gibalikan sa Espiritu Santo ang iyang nangagi nga kinabuhi ug gibutyag ang usa ka butang nga iyang nabuhat kaniadtong usa pa siya ka sakristan sa simbahang Katoliko. Ingon niya, “Mao kana ang kamatuoran. Mao gyud kana sa tinuod nga kamatuoran.” Ingon pa, “Buot mo bang ipasabot nga giisip kadto batok kanako?”

Miingon ko, “Mao kana ang bugtong landong nga akong makita sa imong kinabuhi.”

⁷⁵ Mibalik siya didto ug gisultihan ang doktor, miingon, “Sige, andama na ang tanan, idayon na nato ang operasyon.”

⁷⁶ Miingon ang doktor, “Eksaminon lang nato kanang kasingkasing mo pag-usab.” Ug sa dihang gisusi kadto sa doktor, ang ingon niya, “Dili mo na kinahanglan nga operahan.” Kita n'yo?

⁷⁷ Kung ginakondena kita sa atong mga kasingkasing, gusto nato ang bug-os nga pagkalingkawas. Dili nato gusto nga mahimong alang-alang, nga iglesia. Ang gusto nato nga mahimong tinuod gayud nga iglesia o wala na lang iglesia. Ang gusto nato nga mahimong tinuod nga mga Cristohanon o dili na lang Cristohanon. Ang gusto nato ang hingpit nga kagawasan gikan sa atong mga bisyo, gikan sa atong mga sala, gikan sa atong dautan nga panghunahuna, gikan sa atong dautang binuhatan, gikan sa atong pagpasagad, sa unsa mang nabuhat nato. Ang gusto nato ang hingpit nga kagawasan, aron nga kung ang mga tawo mosulod niini nga iglesia, aron maiampo, gamay'ng pundok lamang kini (tingali dili gani magsobra og usa ka gatus, o duha) nga nagalingkod dinhi, apan bug-os gyud sila nga mapahimutang diha sa mga kamot sa Dios. Ug kung kita magampo, ang Dios dayon magapatalinghug didto sa Langit. Ang gusto sa Dios maoy usa ka tawo nga Iyang makuptan sa Iyang mga kamot, usa ka tawo diin Siya makapahayag, “Aduna Ko'y pagsalig niini. Ipadala Ko kining, Akong masakiton nga sulugoon, didto sa Branham Tabernacle sa Jeffersonville, ug

nagakahiusa man kana nga pundok sa mga tawo.” Aduna gayu’y mahitabo.

⁷⁸ Bueno, tan-awa kung unsa ang Iyang ginabuhat alang kanato bisan pa sa kahimtang nga atong nahimutangan. Unsa pa kaha ang Iyang pagabuhaton kung usa ra ang atong kasingkasing ug nagakahiusa? Ang bugtong paagi nga mahimo nato kana, mao ang paghiusa sa atong mga kasingkasing nga inubanan sa gugma nga inigsoon, nga ginasunod ang mga opisyaes sa iglesia, ug ang pastor, ug ang pastor usab nagasunod sa Dios. Dayon ang Dios nagapamuhat pinaagi sa pastor, pinaagi sa hunta, ngadto sa iglesia, ug ang tanan usa ra ka yunit sa Gingharian sa Dios. Kung aduna kita’y usa ka pundok nga nagkahiniusa, nan ang Dios magapatalinghug gayud. Ayaw itugot nga adunay bisan unsa man nga magpabalaka kaninyo. Ayaw magpalisang sa bisan unsa mang butang.

⁷⁹ Karon, ingon-ana nga matang sa tawo ang giordinahan sa Dios nga maoy moangkon sa yuta. Si Moises hingpit, siya usa ka tawo nga dili gayud mokompromiso. Kung aduna ma’y mga kabalaka ug mga kasamok, ug uban pa, dili gayud siya makipag-kompromiso. Mao kini ang gitinguha sa Dios alang kanato karon.

⁸⁰ Gusto ni Faraon kaniadto nga makig-uyon, miingon, “Moises, puede na kamong manglakaw, ug, apan, biyaan ninyo ang inyong mga anak, o ibilin ang pipila sa inyong mga baka dinhi.”

⁸¹ Ingon niana ang paagi nga gusto sa yawa usa ka Cristohanon sa pagduol niini. “Okey ra man nga magpamiyembro ka sa iglesia, apan ayaw gyud pasayloa si Jones. Okey ra kung madala mo ang imong...kung makaadto ka...Dili man nimo kinahanglan undangon ang imong pagpanigarilyo, ang imong pag-inum-inum, ang imong pagpamakak, ang imong pagpangawat, imong pagpangita og sayup, pagpanglibak. Dili nimo kinahanglan nga undangon kana. Pagpamiyembro lang gud sa iglesia.”

⁸² Apan si Moises dili usa ka tawong mopakig-kompromiso. Ang gusto niya’y hingpit nga kagawasan. Ingon niya, “Wala kami ibilin nga bisan usa ka koko. Dalhon namo ang tanan nga among gipanag-iya, sa dihang moadto na kami sa pagsimba sa Ginoo.”

⁸³ Angay gyud nga ingon niana ang iglesia. “Dawaton namo ang pagkamatarung. Dawaton namo ang pagkabalaan. Dawaton namo ang Balaang Espiritu. Dalhon namo ang usa ka nagkahiusang pundok pagmohalad na kami sa altar. Mamahimo kaming tinuod nga pundok. Wala gayud kami’y ibilin. Dalhon namo ang tanan. Wala’y bisan usa ka koko ang mahabilin dinhi.” Kabalo mo, ug puedeng mag-ampo ang mga tawo sa ingon nianang paagi hangtud nga mosurender na lang ang yawa.

⁸⁴ Ingon niana ang gibuhat ni Moises ug sa iyang panon. Miadto sila didto ug nagpasilong ilalum sa dugo. Kung mamatikdan ninyo, gawas nga sila nakapasilong na ilalum sa dugo, sila wala'y hingpit nga kagawasan. Si Moises, siya mismo, nahiusa siya sa Dios, apan ang Israel dili. Ang sala anaa pa sa gihapon. Ug sila nanagbagulbol batok kang Moises, ug sila nanag-ingon, "Ngano, nganong ginabuhat man nimo kini? Nagadala ka lang og dugang kasamok kanamo." Tungod kay, gidoble man ni Faraon ang ilang kinahanglan buhaton nga mga tisa, ug uban pa. Mao kadto si Moises; bug-os siyang anaa sa mga kamot sa Dios, hingpit nga gipalingkawaas gikan sa pagbantay sa mga karnero, aron sa pagbantay sa mga karnero sa Dios. Hingpit siya nga nakalingkawas, mismo. Apan ang mga tawo wala pa, tungod kay aduna pa'y mga pagbagulbol sa taliwala nila.

⁸⁵ Usa ka gabii kaniadtong ang Dios nagsugo nga mag-ihaw og usa ka nating karnero, nga maoy tipo ni Cristo, ug ang dugo ituslob sa hisopo, nga, mga sagbot lamang (ordinaryo, mapaubsanon), ug ipahid dayon kadto sa balabag ibabaw sa pultahan ug sa mga poste, mao kadtong higayon nga ang Israel hingpit nga nakalingkawas, nga wala ni usa ka koko ang nahabilin. Ang tanan nga ilaha naluwas pud. Ang ilang mga pamilya, ilang mga minahal, ug ang tanan naluwas sa dihang sila hingpit nga nakapasilong ilalum sa dugo.

⁸⁶ Mao kana ang higayon nga ang iglesia hingpit nga makalingkawas, kung ang tanan nakapasilong na ilalum sa Dugo. Sa diha nga ang imong mga sala napailalum na sa Dugo, sa diha nga ang imong pagpanigarilyo, sa diha nga ang imong pagsugal, sa diha nga ang imong pagpanglimbong, sa diha nga ang imong pagpangawat, sa diha nga ang imong pagpamakak, sa dihang ang tanan gipailalum na sa Dugo, kung ingon-ana magkaaduna na'y hingpit nga kaluwasan. Pagnakabuhat ka'g sayup sa usa ka tawo, ginatul-id mo kini. Dili nimo kana madala ilalum sa Dugo, dili kini mopabilin. Dili nimo kini madala. Adunay dili motugot kanimo sa pagbuhat niini. Kung ang imong kaugalingon bug-os, ug hingpit nang nakapasilong ilalum sa Dugo, kung ingon-ana adunay hingpit nga kaluwasan; dayon makabaton ka'g kagawasan nga wala pa gyud nimo nasinati kaniadto. Sa diha nga ang tanan napailalum na sa Dugo, gidala nga masinugtanon ngadto sa Gingharian sa Dios, nan aduna gayu'y tinuod nga kaluwasan.

⁸⁷ Si Jesus bug-os, nga usa gayud ka tawo. Mahimo Siyang mohilak nga sama sa usa ka tawo. Makakaon Siya nga sama sa usa ka tawo. Mahimo Siyang kapuyon nga sama sa usa ka tawo. Siya'y bug-os, nga usa gayud ka tawo, sa Iyang pisikal nga lawas. Ug diha sa Iyang Espiritu, Siya'y bug-os, hingpit gayud nga Dios, mao nga Iyang gihimo ang Iyang unod nga masinugtanon sa Espiritu nga anaa sa sulod Niya. Kita n'yo, Siya gitintal pud sa tanang anggulo nga sama kanato. Siya

usa ka tawo, dili usa ka Manolunda. Usa Siya ka tawo. Aduna Siya'y mga tinguha ug mga tentasyon, nga sama kanato. Ang Biblia nag-ingon niini. Usa Siya ka tawo, dili usa ka Manolunda nga labaw sa tentasyon. Ang Mga Hebreohanon 1 nag-ingon, nga, "Siya'y. . ." Mga Hebreohanon 1:4 nag-ingon, "Siya gihimo nga ubos pa kaysa mga Manolunda." Siya usa ka tawo, bug-os gayud nga tawo; nga ang Dios nahimong bug-os nga tawo, aron maghatud og hingpit nga kaluwasan, ug Iya Siyang gipuno sa Iyang Espiritu. Ang Espiritu Santo anaa Kaniya, nga walay sukod. Ug Siya gitintal nga sama kanato. Ug Siya'y bug-os gayud nga Dios. Gipamatud-an Niya kini sa diha nga Iyang gibanhaw ang mga patay, sa diha nga gipahunong Niya ang kinaiyahan, ang nagadahunog nga kadagatan ug ang makusog nga hangin. Sa dihang nakigsulti Siya ngadto sa mga kahoy, ug uban pa, mituman ang mga niini Kaniya. Siya'y Dios, sa kinasuloran. Ug mahimo man Niya untang magpabilin nga tawo lamang, tungod kay Siya tawo man, pero hingpit ug bug-os Niyang gitugyan ang Iyang Kaugalingon (isip usa ka tawo) ngadto sa mga kamot sa Dios, alang sa pag-alagad sa Dios.

⁸⁸ Ug Siya ang atong ehemplo. Kita'y mga lalaken-an ug mga kababayan-an. Kita'y mga Cristohanon usab. Kung Siya ang atong ehemplo, bug-os natong itugyan ang tibuok natong mga kaugalingon ngadto sa mga kamot sa Espiritu Santo, aron kita mamahimong mga sakop sa Gingharian sa Dios.

⁸⁹ Siya'y hingpit nga tawo; Siya'y hingpit nga Dios. Apan gitugyan Niya ang Iyang mga natural nga bahin ngadto sa Iyahang. . . ug ang Iyang mga pisikal nga bahin, ug ang Iyang Kaugalingong panghunahuna, ug ang Iyang Kaugalingong buhat, ug ang Iyang Kaugalingong mga kahingawa, ug, "Ginabuhat Ko lamang kung unsa ang makapahimuot sa Amahan." Mao kana. Hingpit nga nakalingkawas gikan sa mga tawo. Ang mga sacerdote kaniadto miduol Kaniya, ang mga inilang tawo, ug miingon, "Rabbi, *ingon niini-ug-ingon niana*," ug misulay sa pagsuhol Kaniya aron mosulod sa ilang mga asosasyon ug mga denominasyon. Apan Siya hingpit nga nakalingkawas na niana tungod kay Siya misalig sa Dios.

⁹⁰ Dili ba ginasulti man kaniadto sa Salmista, "Pagaluwason Ko Siya, tungod kay bug-os Siyang misalig Kanako"? Kita n'yo? "Luwason Ko ang Akong Minahal gikan sa mga iro, tungod kay Siya misalig Kanako."

⁹¹ Moabot ang takna sa dihang anaa na kita sa katapusan sa panaw sa kinabuhi, gusto ko kini alang sa akong kaugalingon. Nasayod ko nga gitinguha pud ninyo kini para sa inyoha. Gusto kong isulti Niya, "Pagaluwason Ko siya gikan sa mga apapangig sa kamatayon, tungod kay siya misalig Kanako. Pagaluwason Ko siya gikan sa lubnganan, sa buntag sa pagkabanhaw, hingpit nga pagaluwason siya, ang iyahang kalag, lawas, ug espiritu, tungod kay siya misalig gayud Kanako."

⁹² Hingpit ang tanang mga buhat ni Jesus. Ang tanan kumpleto, og hingpit, nga nangaayo. Hingpit Niyang giayo ang sanlahon gikan sa sanla. Hingpit Niyang giayo ang babaye nga adunay talinugo, gikan sa iyang sakit. Hingpit Niyang gipalingkawas ang kalibutan gikan sa sala, sa dihang namatay Siya niadtong adlaw sa pagpasig-uli. Hingpit Niyang giluwas ang tawo gikan sa matag sala. Giluwas Niya ang Iglesia. Mao nga dili na kinahanglan nga magkinabuhi pa kita ingon nga wala kahigayonan, nga mga tawo. Dili na kita kinahanglan magkinabuhi diha sa usa ka pildi nga kahimtang, tungod kay gipildi na Niya ang yawa ug gidaug na ang tanang pamunoan ug kagamhanan, ug gibuntog sila ilalum sa Iyang mga tiil, ug wala na sila’y balaodnong katungod sa paghari kaninyo. Mga Cristohanon kita, nga puno sa Espiritu Santo. Dili nato kinahanglan nga dik-...nga diktahan kita sa yawa. Giluwas na kita ni Cristo, sa usa ka hingpit nga pagluwas; giluwas kita gikan sa dautan, giluwas kita gikan sa sala, giluwas kita gikan sa mga bisyo, giluwas kita gikan sa pagpanglibak, giluwas kita gikan sa—gikan sa mga pamalikas, giluwas kita gikan sa tanang malaw-ay nga mga butang. Hingpit Niya kitang giluwas ug gipahimutang kita ngadto sa Iyang balaan nga mga kamot; usa ka bug-os, hingpit nga pagluwas.

⁹³ Iyang giayo ang atong mga sakit. Iya kitang gipalingkawas gikan sa balatian, kay kita aduna ma’y titulong abstract niana. Alleluyah! “Kay siya gisamaran tungod sa atong kalapasan, tungod sa Iyang mga labod kita nangaayo.” Siya’y atong Mananamal. Mao nga kadtong makaluluoy, kabus, gi-polio nga babaye, nga naningkamot sa pag-atiman sa iyang bana nga himalatyon na sa kanser, milakaw ang babaye pasulod sa mga dapit nga atua ang Presensya sa Dios. Aduna siya’y pagtoo. Ug siya . . . Nabuhat na sa mga doktor ang tanan-tanan nilang mahimo, busa gisunod sa babaye ang mga sugo sa Dios ug hingpit na nga giayo.

⁹⁴ Ang mga tinun-an kaniadto adunay hingpit nga kaluwasan, bug-os gayud nga kaluwasan. Ngano man? Tungod kay sila bug-os ug hingpit nga puno gayud sa Espiritu Santo. Kung ikaw, usa ka miyembro sa iglesia ug nakapakiglamano sa pastor, o adunay . . . adunay gamay’ng mga kasinatian sa paglukso-lukso, pagsinggit, o pagsulti og laing pinulongan, o kung unsa pa; ug aduna gihapo’y pagkamadinauton sa imong kasingkasing, laing mga binuhatan, nagapamakak, nagapanigarilyo, nagapangibog sa mga babaye; aduna gyu’y butang nga wala pa nahitabo. Aduna gyu’y butang nga sayup. “Kay siya nga nahigugma sa kalibutan, o sa mga butang nga iya sa kalibutan, ang gugma sa Dios wala diha kaniya.” Nalimbongan ka lang. “Pinaagi sa ilang mga bunga maila ninyo sila.”

⁹⁵ Kitang tanan gustong mahiusa, uban sa Balaang Espiritu. Ang matag miyembro kinahanglan magkahiusa, sa usa’g usa.

Ang gugma sa Dios gibubo na diha sa atong mga kasingkasing pinaagi sa Espiritu Santo. Ginahinloan kita Niini gikan sa tanang dili-pagkamatarung. Gipalingkawas kita gikan sa mga butang nga iya sa kalibutan. Si Jesus miingon, “Tungod niini ang tanan makaila nga kamo Akong mga tinun-an, kung kamo naghigugmaay, sa usa’g usa,” sa diha nga ang usa ka miyembro nahigugma og ayo sa usa pa ka miyembro nga andam kini mamatay alang niini.

⁹⁶ Nagasugod ang usa ka dautang butang, sa dihang ang anaa sa gawas nga kalibutan, pipila ka mga babaye ang moabot ug moingon, “Karon, tan-awa, langga, mas nindot unta kanimo kung buhaton nimo *kini*, o buhaton *kana*, isul-ob *kini*, o himoon *kana*, o himoon *kini*, ug mohawa ka gikan nianang panon sa mga holy-roller;” o uban pa nga ingon niana, maong kinahanglan gyud natong mahiusa uban sa Dios!

⁹⁷ Moingon ka, “Bueno, Igsoong Branham, grabe kaayo kana nga tentasyon.” Pero namatay man si Cristo para niana nga katuyoan. Ang yawa napildi na. Gusto nato ang hingpit nga kagawasan. Gusto nato ang iglesia nga putli ug limpyo ug waysambog, ug nahugasan sa Dugo sa Kordero, ug napuno sa Espiritu Santo, ug sa mga ilhanan ug mga katingalahan ug mga milagro. [Blanko nga bahin sa teyp—Ed.] . . .hingpit nga ginaluwas ang tanan. [Blanko nga bahin sa teyp].

⁹⁸ Minahal nga Dios, wala Ka nagagamit og mga butang gawas kung kini bug-os na nga luwas. Dili Mo mahimong dawaton ang usa ka halad nga adunay buling niini. Dili gyud Nimo dawaton ang pag-ampo, kung aduna pa’y nahabilin nga sala sa kinabuhi sa maong tawo. Dili gyud Nimo kana mahimo, Ginoo. Wala nimo kini gibuhat sa nangaging mga kapanahonan, ug dili Nimo kini mahimo sa karon. Busa ang halad kinahanglan nga wala gayu’y buling. Ginoong Dios, sa among paghalad sa among mga kaugalingon sa altar, ingon nga hinalad nga kinabuhi, tangtanga kanamo, Oh Ginoo, ang tanang mga buling sa sala. Akong bug-os nga ginapahinungod ang akong kalag, ug ang akong lawas, ug ang akong kusog, ang akong mga paningkamot, uban niini nga iglesia karong buntaga, ibabaw sa altar. Limpyohi kami pinaagi sa Imong Dugo, ug pasayloa kami sa matag sala nga among nabuhathat. Ug hinaut nga ang gamhanang Balaang Espiritu madagayaon nga magpabilin sulod kanamo, ug ang Iyang Presensiya magauban kanamo sa among paggikan niining tabernakulo karong buntaga, aron masayod kami sulod sa among mga kaugalingon nga Siya nagpasaylo na kanamo. Dayon ang among pag-ampo mamahimo nang, “Pasayloa kami sa among mga kalapasan maingon nga ginapasaylo namo ang mga nakalapas batok kanamo.” Itugot kini, Ginoo.

⁹⁹ Duolan Mo kami karon, panalangini kami ug panalipdi kami hangtud nga magtigum na usab kami alang sa panggabiing panerbisyo. Hinaut nga kami mosulod nga limpyo ang mga

kamot ug putli ang kasingkasing, aron nga dili Mo kami isalikway, kay nagtinguha kami og usa ka bug-os ug hingpit nga kalingkawasan gikan sa bisan unsa, Ginoo, nga maoy magpugong kanamo nga mamahimong kahayag sa kalibutan. ang kandila nga gibutang ibabaw sa usa ka bungtod, nga wala gitago ilalum sa gantangan, apan ang kandila nga gipahimutang ibabaw sa bungtod, nga nagahatag og kahayag aron giyahan ang mga lakang sa mga tawo diha sa husto nga dalan. Itugot kini, Amahan. Ginapangamuyo namo kini sa Ngalan ni Jesus, ug alang sa Iyang kahimayaan. Amen.

¹⁰⁰ Akong hangyoon si Doc . . . Sa tan-aw ko anaa siya dinha sa luyo, o ang usa sa mga diyakono nga ania karon. Aron mabasa kini sa iglesia, Dok, dali ibutang kini diha sa bulletin board aron makita kini sa kongregasyon sa ilang paggawas. Ug dayon si Igsoong Collins, kung ania siya . . . Ania ba si Igsoong Collins? Ihatag sa iya kining uban.

¹⁰¹ Ug, sige, sir, ug atong tan-awon kung unsa . . . [Ginabasa ni Igsoong Branham ang hamubo nga sulat—Ed.] Usa kini ka tawo nga nagahangyo og pagpakighinabi. Kanunay kanang ginatugutan. Ug malipayon kami.

Ug aduna ko'y mga pagpakighinabi. Kita n'yo, ang buhaton n'yo lang maoy tawagan ang among numero didto. Kami—daghan kaayo kami og problema sa balay, nasayod ang iglesia niana. Mga estranghero kini. Ang iglesia nasayod na bahin niini. Aduna unta'y hamubo nga pahibalo nga ibutang . . . Ipabutang ko kadto dinhi sa sulod sa iglesia, usab, para sa mga moabot pa. Nakita n'yo, daghan pa kaayo, nga dili na namo silang tanan maatiman, kadto lang ang mga nagaanhi nga may numero. Kita n'yo? Ug kami . . . Kung matawagan ninyo ang BUTler 2-1-5-1-9, BUTler. [Giusab na ang maong numero sa telepono—Ed.] Ug bisan kinsa sa mga miyembro nga makakita sa bisan kinsa nga gusto unta, kanunay akong malipay nga makahimamat og mga tawo. Apan aduna man gud kita'y ginusunod nga sistema. Adunay pipila nga nanawag na, ubay-ubay gyud, kita n'yo. Ug magtagsatagsa kami'g duol, sunod-sunod, sa among pag-abot. Dayon adunay . . . Kasagaran man gud kaniadto, medyo sinalagma ang among pamaagi, bisan unsa na lang, laktaw-laktaw, og sal-ang sal-ang, mao nga ang mga tawo namauli nga nangapalaw ug tanan na. Karon nabutang na nila ang tanan sa kahan-ayan. Ug mao kana ang atong ginahisgotan karon, kita n'yo, ipahimutang ang tanan nga han-ay, sa husto gayud.

Ug malipay ako nga makita kining pinanggag panon, kung motawag lang sila sa BUTler 2-15-19 (1-5-1-9), ug si Mr. Mercier o si Mr. Goad, usa kanila, ang motubag sa telepono ug pahibaloon kamo sa eksaktong petsa kung kanus-a kamo magkaaduna og iskediyul. Aduna kami'y og lugar didto, nga naka-air condition, ug nahilandam na aron dawaton ang mga tawo ug aron maiampo sila. Malipay gyud kami nga buhaton kana.

¹⁰² Karon, ang hinungdan nga wala ko nagaanhi sa iglesia, nga abi sa mga tawo nagalikay ako sa mga tawo; dili ingon niana. Naninguha lang ko nga—nga eksaktong anaa sa kahanayan. Kita n'yo? Mao kana ang gusto kong mahitabo, nga dili magpakita og pabor kang kinsa man nga tawo. Sa matag indibiduwal, kang bisan kinsa, asa man nga dapit, ni bisan kanus-a, kita n'yo; unsa man nga kolor, o kredo, wala kini og labot. Nagaanhi kami mismo ug nagapakighimamat sa mga tawo. Ug kung aduna sila'y unsa man nga panginahanglan, magpabilin kami mismo diha sa Dios hangtud nga masulbad kini. Kung aduna sila'y gustong mahibaloan bahin sa mga panagtigum, siyempre, amo kining ginatubag ug ginaklaro kini. Ang paggiya lamang kini sa Balaang Espiritu. Ug kana'y . . . Sa niining paagiha, nagtoo ko nga, eksaktong ginahimo niini nga managsama ang tanan. Busa, walay tawong ginapaboran, walay mga pinalabi.

¹⁰³ Aduna ba'y mga tawo nga mianhi aron maiampo, karong buntaga, nga masakiton ug gusto nga maiampo? Sige. Wala.

Kung ingon-ana kantahon nato ang maayong alawiton para sa . . . para sa pagsimba. Unsa ba'y angay natong kantahon karong buntaga? "Unsa ang makawagtang sa akong sala?" Kabalo ba ka niini, Teddy? "Walay lain kondili ang Dugo ni Jesus." Unsa ang . . .

[Nagapakig-estorya ang usa ka igsoong babaye kang Igsoong Branham—Ed.] Sige, sir. Gusto ba nimo siyang maiampo karon?

Magaampo ako alang nianang babaye. Magapandong og mga kamot niining babaye dinhi. Mahimo bang iduko mo ang imong ulo uban kanako, kung ingon-ana, hilum na ta.

¹⁰⁴ Minahal nga Dios, adunay usa ka babaye nga grabe ang sakit. Ang among igsoong babaye nagarepresentar mismo, nga iduol ang kanser sa uban, para mobarug sa kal-ang, para sa uban. Apan giayo Mo siya gikan niana, Ginoo, pipila na ka adlaw ang milabay, nga nahibaloan kining mga butanga. Imong gitugotan nga siya ang makahibalo niini, mismo, niadtong tungora, Ginoo, nga mailhan niya nga gikan kini gayud sa Imo. Ginapandongan nako siya sa akong mga kamot, ug nagapangamuyo og kalooy para nianang laing babaye nga iyang girepresentar. Hinaut nga ang grasya sa Dios, ang Gahum sa Espiritu Santo. . . Kung aduna ma'y unsa man nga kadautan sa among mga kasingkasing, Ginoo, ipadayag kini kanamo, unà, dayon among ipaabot, para tul-iron kini. Dayon among hingsayran nga nakakaplag kami og kahimut-anan sa Dios, aduna kami og pakigdait uban sa Dios, nga madawat namo ang among ginapangamuyo, tungod kay walay pagkondena kanamo. Itugot kini, Ginoo. Sa Ngalan ni Jesus ako nagaampo. Amen.

Sige.

What can wash away my sin?

Nothing but the Blood of Jesus;
 What can make me whole again?
 Nothing but the Blood of Jesus.

Oh, precious is the flow
 That makes me white as snow;
 No other fount I know,
 Nothing but the Blood of Jesus.

¹⁰⁵ Pila man kaninyo ang mibati nga ang tanan ninyong kasal-
 anan napailalum na sa Dugo? Atong kantahon kini samtang
 nakapataas ang atong mga kamot karon.

What can wash away my sin?
 Nothing but the Blood of Jesus;
 What can make me whole again?
 Nothing but the Blood of Jesus.

Karon sa diha nga gipaubos nato ang atong mga kamot,
 maglamanohay kita.

Precious is . . .


Husto kana, sa inyong palibot.

. . . white as snow;
 No other fount I know,
 Nothing but the Blood of Jesus.

Gihigugma ba ninyo Siya? Amen.

Oh, how I love Jesus,
 Oh, how I love Jesus,

Karon pagpabilin diha niini, karon. Ang tanan manghawid
 lang gyud sa Dios.

How I love Jesus,
 Because He first loved me.
 I'll never forsake . . . 

59-0712 Usa Ka Hingpit Nga Kaluwasan
Branham Tabernacle
Jeffersonville, Indiana U.S.A.

CEBUANO

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org